



Komunikadu Imprensa 25 Marsu 2024

Abandona oan no feen, adopsaun no desputa rai sai preokupasaun partisipante sira iha Aldeia Bonuk, Suku Labarai, Covalima

Iha 12 Marsu 2024, JSMP hala'o atividade fahe informasaun ba autoridade lokál no comunidade sira hosi Aldeia Bonuk, Suku Labarai, Postu Administrativu Suai Vila, Munisípiu Covalima. Atividade ne'e realiza iha Sede Aldeia Bonuk liuhosi Programa Apoiu Seguransa Komunitáriu (PASK) tanba serbisu hamutuk ho The Asia Foundation (TAF) ne'ebe finansia hosi Embaixada Nova Zelândia iha Timor-Leste.

Objetivu hosi dezaminasaun informasaun ne'e atu hasa'e koñesimentu lideransa komunitária no membru comunidade sira nia koñesimentu kona-ba, direitu umanu, definisaun lei, natureza krime sira Violénsia Bazeia ba Jéneru (VBJ), serbisu rede referral sira no dalan ba asesu ba justisa formál nune'e liderasan komunitária no comunidade bele hatene no jere sira nia kazu ba iha justisa formál.

"JSMP konsidera informasaun sobre asesu ba justisa formál importante ba comunidade no estrutura sira aldeia, nune'e bele fasilita sira atu rezolve sira nia problema no prosesa sira nia kazu tuir justisa formál tantu nivel komunitária no nivel nasional," dehan Sra. Ana Paula Marçal, Diretora Ezekutiva JSMP.

Iha dezaminasaun informasaun ne'e, partisipante sira hato'o sira nia preokupasaun kona-ba abandona oan no feen, adopsaun no hadau malu rai.

Relasiona ho abandona oan ka feen, JSMP informa katak bainhira rona, haree, hatene no aan rasik sai hela vítima ba hahalok ne'e no hakarak atu lori ba prosesu iha tribunál, bele hato'o keixa ba iha Ministériu Públiku nu'udar representante ba menór nune'e bele toma prosesu hodi asegura direitu alimentár ba menór. Alende ne'e JSMP mós bele ajuda atu akompaña nia prosesu kazu ne'e nune'e menór sira bele hetan sira ninia direitu, importante mak dokumentu hosi labarik no inan-aman nian.

Entretantu kestaun kona-ba rai, JSMP hatan katak tuir lei sidadaun hotu-hotu iha direitu ba propridade maibé ba propridade sira ne'ebé ita nian. Katak rai refere ita hetan liuhosi hola, eransa hosi inan-aman, doasaun. Karik durante ne'e iha comunidade balun hasoru hela problema kona-ba rai, di'ak liu koopera ho autoridade lokál no autóridade judisiál nune'e bele rezolve tuir mekanizmu sira ne'ebé durante ne'e iha ona.

Kona-ba adopsaun ema nia oan, JSMP esplika katak atu halo adopsaun tenke iha karta adopsaun hosi notariadu nune'e karik iha futuru akontese problema, karta ne'e sai hanesan baze atu tribunál bele fó desizaun. JSMP mós husu ba comunidade sira ne'ebé halo adopsaun la liuhosi notariadu atu

rezolve sira nia problema sira ne'e liuhosi mekanizmu tradisionál ne'ebé hatuur ona nune'e la mosu problema iha futuru.

Partisipante ne'ebé partisipa iha dezaminasaun informasaun ne'e hamutuk na'in 32, kompostu hosi mane 12 no feto 20. Partisipante sira ne'e mak hanesan estrutura aldeia, xefe aldeia, xefe suku, xefe juventude feto no mane, delegadu no delegada, comunidade inklui lia-na'in.

Atu hetan informasaun kompletu, favor kontaktu:

Ana Paula Marcal
Diretora Ezekutiva JSMP
Diresaun e-mail: ana@jsmp.tl
Telefone: (+670) 33238883 | 77040735
Website: <https://jsmp.tl>
info@jsmp.tl